



Sebagai ibu bapa, kita perlu memberikan sokongan kepada anak dengan memastikan mereka menjalani program pertuturan selepas pembedahan*

Suzana Zaily Zin, Ibu Iman Aisya

Telinga bionik atasi masalah pekak

● Iman Aisya mampu bertutur selepas jalani prosedur implan koklea

Oleh Halina Mohd Noor
halina_mdnoor@nstp.com.my

Harap membawa anak perempuannya berjumpa doktor kerana sering demam dan mengalami sawan, merungkaikan permasalahan sebenar yang dialami anaknya.

Dunia Suzana Zaily Zin, 43, terasa gelap ketika dimaklumkan satu-satunya anak perempuannya, Iman Aisya Saharom yang baru berusia satu setengah tahun disahkan mengalami pekak tahap dua.

Iman Aisya didapati hanya boleh mendengar bunyi yang kuat seperti kapal terbang, guruh atau gegaran berbanding bunyi biasa.

"Sebagai ibu, sukar untuk menerima kenyataan itu kerana selama ini anak saya ada mengeluarkan suara termasuk menangis apabila berebut mainan dengan tiga abangnya.

"Keadaan ini memberi tekanan hebat sehingga timbul keinginan untuk menyerahkannya kepada ibu saya tetapi tidak jadi apabila melihat tiga abangnya melayan Iman Aisya dengan mesra seolah olah tiada langsung masalah komunikasi," katanya.

Harapan untuk anaknya mendengar dan bertutur menjadi kenyataan apabila pada tahun 2008, anak kecil itu menjalani pembedahan implan koklea atau dikenali sebagai telinga bionik. Prosedur membabitkan telinga

kanan dan ditanam di belakang kepala ketika usianya mencecah tiga tahun.

Tahap pendengaran mengikut jarak

Iman Aisya mula boleh mendengar setahap demi setahap bermula dengan jarak semeter ke hadapan, dua meter dan sehingga jarak pendengaran bagi individu normal.

Pembedahan kedua membabitkan telinga kiri dijalankan pada tahun 2015 iaitu ketika anaknya berusia sepuluh tahun.

Ketika Iman mula melangkah ke sekolah tadika, sebaik selepas pembedahan pertama, beliau umpama anak kecil kerana pertuturannya tidak begitu lancar berbanding rakan lain seusianya.

"Mulanya memang sukar untuk Iman Aisya menjalani kehidupan seperti kanak-kanak biasa, namun saya bersyukur kerana sehingga kini pembelajarannya berjalan lancar seperti biasa.

"Sebagai ibu bapa, kita perlu memberikan sokongan kepada anak dengan memastikan mereka menjalani program pertuturan selepas pembedahan," katanya.

Suzana ditemui pada pelancaran program 'Hear and Be Heard' anjuran Institut Telinga, Pendengaran dan Pertuturan (I-HEARS), Universiti Kebangsaan Malaysia

(UKM) dan Yayasan Sime Darby (YSD).

Pantau perkembangan pendengaran

Sebelum itu, Ahli Majlis Tertinggi YSD, Tan Seri Datuk Seri Dr Wan Mohd Zahid Mohd Noordin menyerahkan cek berjumlah RM300,000 kepada Institut Telinga, Pendengaran dan Pertuturan

(I-HEARS) yang diwakili oleh Naib Canselor UKM, Prof Tan Sri Datuk Seri Dr Noor Azlan Ghuzali.

Sumbangan itu bagi membolehkan I-HEARS menjalankan program selama tiga tahun termasuk siri seminar kesedaran, bengkel untuk ibu bapa dan kursus jangka pendek untuk ahli profesional.

Sementara itu, Pengarah I-HEARS, Prof Dr Siti Zamratol-Mai Sarah Mukari, berkata purata umur untuk mengenal pasti kanak-kanak bermasalah pendengaran adalah antara tiga bulan sehingga enam bulan.

"Intervensi awal penting bagi meningkatkan peluang kanak-kanak mencapai perkembangan pendengaran normal.

"Kemahiran perkembangan bahasa dan pertuturan adalah asas untuk membolehkan mereka mengakses sistem pendidikan seajar dengan kanak-kanak normal dan seterusnya mencapai potensi mereka," katanya.

Info

Membantu kanak-kanak pekak

- Mendengar
- Bertutur
- Menjalani kehidupan normal.

Hasil kajian I-HEARS

- 50 peratus pelajar pekak terpaksa meninggalkan sekolah menengah.

- Tahap membaca yang sangat rendah.
- 30 peratus meninggalkan sekolah secara sukarela kerana buta huruf.
- I-HEARS ditubuhkan pada 2013.
- Kesenambungan daripada program implan koklea.
- 465 kes pembedahan dan rehabilitasi masalah pendengaran.



Dr Wan Mohd Zahid (empat kanan) menyerahkan sumbangan bernilai RM300,000 kepada Dr Noor Azlan (dua kiri) sempena majlis pelancaran Program 'Hear and Be Heard' di Bangunan Pentadbiran, Universiti Kebangsaan Malaysia (UKM), Bangi, Putrajaya, Penerima Implan Koklea, Kai Xin (tiga kanan), Mohd Uzair Mohd Boin (tiga kiri) dan Iman Aisya (tengah).